

妙諦法音

文殊師利問菩提經

鳩摩羅什譯

南無本師釋迦牟尼佛

自歸於佛 當願眾生 紹隆佛種 發無上意

自歸於法 當願眾生 深入經藏 智慧如海

自歸於僧 當願眾生 統理大眾 一切無礙

文殊師利問菩提經 （伽耶山頂經）

如是我聞：一時，佛初得道，在摩伽陀國伽耶山祠。

與大比丘眾千人俱，其先悉是辮髮仙人，皆阿羅漢，所作已辦，心得自在，逮得己利，盡諸有結，正智解脫。

菩薩萬人，皆從十方世界來集，有大威德，皆得諸忍、諸陀羅尼、諸深三昧，具諸神通。文殊師利菩薩、觀世音菩薩、大勢至菩薩、香象菩薩、勇施菩薩、隨智行菩薩，以為上首。如是等菩薩大眾，百千萬億，其數無量。

并諸天、龍、夜叉、乾闥婆、阿修羅、迦樓羅、緊那羅、摩睺羅伽，人、非

人等，大眾圍繞。

爾時，世尊入諸佛甚深三昧，如實諦觀諸法性相。

而作是念：我得阿耨多羅三藐三菩提、得一切智慧，除諸重擔、度三有嶮道，滅無明、得真明，拔邪箭、斷渴愛，成法船、擊法鼓、吹法螺、建法幢，轉生死種，示涅槃性，閉塞邪道，開於正路，離諸惡業，示于福田。

我今當觀：誰得阿耨多羅三藐三菩提，為以身得？為以心得？

若以身得，身則無知、無作，如草木瓦石，四大所造、從父母生，以衣服、飲食、臥具、澡浴而得存立，必歸敗壞無常磨滅。

而是菩提，但有名字世俗故說，無形、無色、無定、無相、無向、無入、無道，過諸言說，出於三界，無見、無聞、無覺、無知，亦無所得、亦無戲論，無問、無示、無有文字、無語言道。

若以心得，心從眾緣生。眾緣生故空如幻，無處、無相、無性，亦無所有。

於是中得菩提者，所用法得阿耨多羅三藐三菩提，是法皆空，但有名字。以世俗故，而有言說。是皆憶想分別，實無所有，無有根本，亦無體相。無受、無著、無染、無離。一相，所謂無相。

是故，於此法中，無有得者。無所用法，亦無菩提。如是通達，是則名為阿耨多羅三藐三菩提。

爾時，文殊師利法王子，在大會中，立佛右面，執大寶蓋，以覆佛上。時，文殊師利默知世尊所念如是，即白佛言：世尊！若菩提如是相者，善男子善女人，云何發心？

佛告文殊師利：善男子善女人，當隨菩提相，而發其心。

世尊，菩提相者，當云何說？

佛告文殊師利：菩提相者，出於三界，過世俗法，語言道斷，滅諸發。無發是發菩提。

文殊師利！是故，菩薩應滅諸發，發菩提心。無發，是發菩提。

發菩提心者，如如法性，相如實際，無分別，不緣身心，是發菩提。

不著諸法，不增、不減、不異、不一，是發菩提。

如鏡中像、如熱時焰、如影、如響、如水中月，應當如是發菩提心。

爾時，會中，有天子，名月淨光德，得阿惟越致。問文殊師利法王子言：菩薩緣何事故行菩薩道？

文殊師利言：汝可以此，問於世尊。

佛即告文殊師利：汝答月淨光德天子所問行法。

文殊師利謂天子言：汝可善聽，我今當說。天子！當知諸菩薩道，以大悲為本，緣於眾生。

天子言：菩薩大悲，以何為本？

文殊師利言：以直心為本。

又問：直心，以何為本？

答言：於一切眾生，等心為本。

又問：等心，以何為本？

答言：無別異行為本。

又問：無別異行，以何為本？

答言：以深淨心為本。

又問：深淨心，以何為本？

答言：以阿耨多羅三藐三菩提心為本。

又問：阿耨多羅三藐三菩提心，以何為本？

答言：以六波羅蜜為本。

又問：六波羅蜜，以何為本？

答言：方便慧為本。

又問：方便慧，以何為本？

答言：不放逸為本。

又問：不放逸，以何為本？

答言：三善行為本。

又問：三善行，以何為本？

答言：以十善業道為本。

又問：十善業道，以何為本？

答言：以攝六根為本。

又問：攝六根，以何為本？

答言：以正憶念為本。

又問：正憶念，以何為本？

答言：以正觀為本。

又問：正觀，以何為本？

答言：以堅念不忘為本。

天子言：文殊師利！菩薩有幾心，能攝因、能攝果？

文殊師利言：天子！諸菩薩有四心，能攝因、能攝果。

何等為四？一者初發心，二者行道心，三者不退轉心，四者一生補處心。

初發心，為行道心作因緣。行道心，為不退轉心作因緣。不退轉心，為一生補處心作因緣。

復次，天子！當知：初發心，如種穀田中。行道心，如穀子增長。不退轉心，如花果始成。補處心，如花果有用。

又，初發心，如車匠集材。行道心，如斲治材木。不退轉心，如安施材木。一生補處心，如車成運致。

又，初發心，如月新生。行道心，如月五日。不退轉心，如月十日。一生補

處心，如月十四日。如來智慧，如月十五日。

又，初發心，能過聲聞地。行道心，能過辟支佛地。不退轉心，能過不定地。一生補處心，安住定地。

又，初發心，如學初章。行道心，如學第二章。不退轉心，如能以章為用。一生補處心，如通達深經。

又，初發心，從因生。行道心，從智生。不退轉心，從斷生。補處心，從果生。

又，初發心，因勢力。行道心，智勢力。不退轉心，斷勢力。補處心，果勢力。

又，初發心，如病者求藥。行道心，如分別藥。不退轉心，如病服藥。補處心，如病得瘥。

又，初發心，法王家生。行道心，學法王法。不退轉心，能具足學法王法。

補處心，學法王法，能得自在。

爾時，大眾中，有天子名定光明主，不退轉於阿耨多羅三藐三菩提。定光明主天子語文殊師利法王子言：何等是菩薩摩訶薩略道？以是略道，疾得阿耨多羅三藐三菩提。

文殊師利言：天子！菩薩摩訶薩略道有二，以是略道疾得阿耨多羅三藐三菩提。

何等為二？一者方便，二者慧。攝善法，名為方便。分散諸法，名為慧。又，方便，名為隨眾生行。慧，名不轉一切法相。

方便，名待應眾生心。慧，名不待一切法。

方便，名和合諸法。慧，名捨離諸法。

方便，名起因緣。慧，名滅因緣。

方便，名知分別諸法。慧，名不分別法性。

方便，名莊嚴佛土。慧，名莊嚴佛土無所分別。

方便，名知眾生諸根利鈍。慧，名不得眾生。

方便，名能至道場。慧，名能得一切佛法。

天子！當知菩薩摩訶薩，復有二道。以是二道，疾得阿耨多羅三藐三菩提。何等為二？一者助道，二者斷道。

助道者，五波羅蜜。斷道者，般若波羅蜜。

復有二道。何等為二？一者有繫道，二者無繫道。

有繫道者，五波羅蜜。無繫道者，般若波羅蜜。

復有二道：一者有量道，二者無量道。

有量道者，取相分別。無量道者，不取相分別。

復有二道：一者智道，二者斷道。

智道者，初地至七地。斷道者，八地至十地。

爾時，會中有菩薩名隨智勇行，問文殊師利法王子言：何謂為「菩薩義」？何謂為「菩薩智」？

文殊師利言：善男子！義，名無用。智，名有用。

何謂「義名無用」？

義，是無為。無為法，於法無用、非用。

又，義者，非染相、非離相。是義，於法無用、非用。

又，義，不增不減，於法無用、非用。

天子！何謂為「智」？智，是忍道，是心所用，非無用。是故，智名有用，非無用。

智，功歸於斷。是故，智，名有用，非無用。

智，名善知五陰、十二入、十八界、十二因緣，是處非處。是故，智，名有用，非無用。

復次，天子！諸菩薩有十智。

何等為十？一者因智，二者果智，三者義智，四者方便智，五者慧智，六者攝智，七者波羅蜜智，八者大悲智，九者成就眾生智，十者不著一切法智。

復次，天子！諸菩薩有十發。

何等為十？一者身發，欲令眾生生身業清淨故。二者口發，欲令眾生口業清淨故。三者意發，欲令眾生意業清淨故。四者內發，一切內物不貪著故。五者外發，欲令眾生住正行故。六者智發，具足佛智故。七者慈發，念一切功德莊嚴故。八者眾生成熟發，守護智慧藥故。九者有為智發，具足定聚故。十者無為智發，心不著三界故。

復次，天子！諸菩薩有十行。

何等為十？一者波羅蜜行，二者攝行，三者慧行，四者方便行，五者大悲行，六者求助慧法行，七者求助智法行，八者心清淨行，九者觀諸諦行，十者

一切所受無貪著行。

復次，天子！諸菩薩復有十思惟盡。

何等為十？一者思惟事盡，二者思惟受盡，三者思惟法盡，四者思惟煩惱盡，五者思惟見盡，六者思惟邪盡，七者思惟愛盡，八者思惟不著盡，九者思惟結使盡，十者思惟著道場行盡。

復次，天子！諸菩薩復有十治法。

何等為十？一者治慳貪心，雨布施雨故。二者治破戒心，三法清淨故。三者治瞋恚心，修行慈忍故。四者治懈怠心，求佛法無厭故。五者治不善覺觀心，得禪定解脫自在故。六者治愚癡心，生助決定般若波羅蜜法故。七者治諸煩惱心，生助道法故。八者治顛倒道心，修助四諦法故。九者治心，時非時自在行故。十者治我觀，無我法故。

復次，天子！諸菩薩復有十善地。

何等為十？一者身善，離身三惡故。二者口善，離口四惡故。三者意善，離心三惡故。四者內善，不著見身故。五者外善，不著一切法故。六者不著助智善，不貪助道法故。七者不自高善，思惟聖道性故。八者除身善，修集般若波羅蜜故。九者離倒善，不誑一切眾生故。十者不惜身命善，以大悲化眾生故。

復次，天子！諸菩薩貴隨法行者，能得菩提，非不貴隨法行。

隨法行者，如說能行。不隨法行者，但有言說，不能如所說行。

復次，天子！諸菩薩復有二隨法行。

何等為二？一者行道，二者行斷。

復有二隨法行。

何等為二？一者身自修行善，二者教化眾生。

復有二隨法行。

何等為二？一者行智行，二者不行智行。

復有二隨法行。

何等為二？一者善分別諸地，二者不分別地、非地。

復有二隨法行。

何等為二？一者知諸地過，而能轉進。二者善知具足，從一地至一地。

復有二隨法行。何等為二？

一者善知聲聞、辟支佛道。二者善知佛道，不退轉行。

爾時，佛讚文殊師利法王子言：善哉！善哉！汝能為諸菩薩摩訶薩，說本業道。誠如所說。

說是法時，十千菩薩得無生法忍。

文殊師利法王子，一切世間，天、人、阿修羅，聞佛所說，歡喜信受。

文殊師利問菩提經

受持及讀誦 讚歎並宣說 福慧俱增長 災障悉消除 現眷咸安康 先親得超昇 見聞與隨喜 皆共成佛道

